

ZAKON  
O REGISTRACIJI POSLOVNIH SUBJEKATA  
U FEDERACIJI BOSNE I HERCEGOVINE  
(“Službene novine Federacije BiH”, br 27/05 i 68/05)

IZVOD

Zakonom o registraciji poslovnih subjekata Bosne i Hercegovine, u skladu sa Okvirnim zakonom (“Sl. glasnik BiH”, br. 42/04 ), uređuju se pravila vanparničnog postupka na osnovu kojih nadležni registarski sud postupa i odlučuje o upisu u sudski registar poslovnih subjekata u Federaciji Bosne i Hercegovine.

Postupak upisa u registar poslovnih subjekata u Federaciji BiH je hitan, jednoobrazan i primjenjiv na sve poslovne subjekte osnovane u BiH, kako od domaćih, tako i od stranih pravnih i fizičkih lica.

Subjekti obavezni na registraciju su: svi oblici privrednih društava i njihovog povezivanja, javna preduzeća, intitucije koje imaju javne ovlasti, ustanove, javne korporacije, poslovna udruženja, zadruge, zadružni savezi i drugi subjekti određeni posebnim zakonom.

U registar se upisuje: osnivanje, povezivanje i prestanak subjekta upisa, osnivanje odnosno prestanak dijela subjekta upisa, sve statusne promjene uključujući promjene oblika organiziranja subjekta, podaci o subjektu upisa koji su od značaja za pravni promet i njihova izmjena, podaci u vezi sa stečajnim odnosno likvidacionim postupkom, podaci o pokretanju postupka brisanja subjekta registracije, kao i drugi podaci. U registar se upisuje i zabrana obavljanja djelatnosti na osnovu pravomoćnog rješenja nadležnog organa, privremene mjere odnosno zabilježbe o odlukama donesenim u skladu sa drugim propisima.

Poglavlje II reguliše postupak registracije: nadležnost za vođenje registra, nadležnost u slučaju promjene sjedišta, sadržaj registra i troškove registracije. Registar vode sudovi određeni zakonom kojim se uređuje organizacija i nadležnost sudova u Federaciji BiH. Prijava za registraciju subjekta upisa može se predati bilo kojem registarskom sudu, nezavisno o sjedištu upisa.

U poglavlju III utvrđeni su obavezni podaci koji se sastoje od općih i posebnih podataka. Opće podatke o poslovnim subjektima nadležni registarski sud unosi u glavnu knjigu registra.

Poglavlja IV i V regulišu isprave i druge akte potrebne za upis u registar poslovnog subjekta i pojedinačnih oblika poslovnih subjekata kao sto su: dionička društva, dionička društva za osiguranje, banke ili druge finansijske organizacije, društva sa ograničenom odgovornošću, društva sa neograničenom solidarnom odgovornošću i komanditnog društva, javnog preduzeća i privatizacije preduzeća, preduzeća koja imaju javna ovlaštenja, poslovnog udruženja, zadruge i zadružnog saveza i prokura.

Poglavlja VI i VII regulišu isprave potrebne za upis promjena podataka od značaja za pravni promet i isprave potrebne za upis statusnih promjena i promjena oblika poslovnih subjekata.

U poglavlju VIII utvrđen je postupak upisa podataka u registar prijava i ispitivanje prijave za upis u registar koji se odnosi na: podnošenje prijave za registraciju, obrazac prijave, postupak po prijemu prijave, identitet podnosioca prijave, načelo isključivosti firme poslovnog subjekta, postupanje nadležnosti registarskog suda po prijemu prijave za registraciju, ispitivanje prijave, ispitivanje isprava, greške u pisanju.

Poglavlja IX i X regulišu odluke nadležnog registarskog suda i pravne lijekove.

U poglavljima XI, XII, XIII regulisan je postupak upisa podataka značajnih za pravni promet i njihovu izmjenu, postupak brisanja iz registra i pribavljanje poreznog identifikacionog broja i carinskog broja.

Obavezna obavještenja registarskog suda, dodatne usluge registra i kaznene odredbe za prekršaj odgovornog lica u sudu u zakonom predviđenim slučajevima regulisana su poglavljima XIV, XV i XVI.

Nadležni registarski sud rješenje o registraciji osnivanja odnosno statusne promjene poslovnog subjekta po donošenju dostavlja: poreznom organu nadležnom prema sjedištu subjekta upisa - Upravi za indirektno oporezivanje, općini i kantonu nadležnom prema sjedištu subjekta upisa, statističkom uredu i privrednoj

komori, zavodu za penziono i invalidsko osiguranje prema sjedištu subjekta upisa radi registracije, carinskom organu nadležno prema mjestu sjedišta subjekta upisa, ukoliko je subjekt upisa registriran za vanjskotrgovinsko poslovanje i nadležnim regulatornim tijelima u skladu sa posebnim propisima koji utvrđuju uvjete i izdaju dozvole, odnosno odobrenja za obavljanje pojedinih djelatnosti, ako je subjekt upisa registriran za takvu djelatnost.

Ovjeran izvod iz registra izdat od bilo kojeg registarskog suda predstavlja javnu ispravu na teritoriji Bosne i Hercegovine.

Nadležni registarski sud izdat će rješenje o registraciji poslovnog subjekta **pet dana** od dana uredno predate prijave. Ukoliko postoje nedostaci zbog kojih nije moguće izvršiti registraciju u skladu sa odredbama ovog Zakona, registarski sud će obavjestiti podnosioca prijave da u određenom roku otkloni konkretne nedostatke.

Pravomoćno rješenje o registraciji objavljuje se u «Službenim novinama Federacije BiH».

Danom početka primjene ovog Zakona prestao je da važi Zakon o postupku upisa pravnih lica u sudski registar («Sl. novine Federacije BiH», br. 4/00, 19/00, 32/00, 49/00 i 19/03) i Uredba o upisu u sudski registar pravnih lica koje obavljaju privrednu djelatnost («Sl. novine Federacije BiH», br. 12/00, 16/00, 38/00 i 58/01).

Ovaj Zakon je stupio na snagu 05.05.2005. godine, a počeo se primjenjivati najkasnije do 31.12.2006. godine.

**Zakon o izmjeni Zakona o registraciji poslovnih subjekata u Federaciji Bosne i Hercegovine je objavljen 7. decembra 2005. godine, a stupio je na snagu 8. decembra 2005. godine.**